



Philipp Tuor, il president da la Societad da musica Trun.



Il president dal cussegl grond Duri Campell (a san.) en discussiun cun Robert Casanova, il president da l'Uniun chantunala da musica dal Grischun.



Trais musicants fidaivels e veterans da musica: Lucas Degonda, Gion Battist Degonda e Cyril Bass (da san.).



La Societad da musica Breil era represchentada cun 28 veterans e retschet persuerter la bandieretta da l'uniun dals veterans: Josef Schaniel, il president dals veterans da musica e Mario Camartin da la Societad da musica Breil (da san.).



Dus veterans che han vivi per la musica: Giusep Caduff ed Arnold Spescha (da san.).



Veteranas e veterans ch'èn vegnids undrads a Trun per lur commembranza da 60, 50, 35 e 25 onns tar ina furmazion da musica.

## Pertge betg ina musica da veterans?

Uniun dals veterans da musica dal Grischun

DA GION NUTEGN STGIER / ANR

■ **Josef Schaniel ha manà en moda suverana sia emprima radunanza sco president da l'uniun. Eventualmain avain nus en il Grischun bainprest ina musica da veterans. Organisà la dieta en moda perfetga ha la Societad da musica Trun. En in onn ha quella lieu a Savognin.** La vischnanca da Trun ha purschè tetg a passa 400 veterans da musica da noss chantun e suenter la dieta èn tuts turnads a chasa da la Surselva cun bunas impressiuns. Ils Sursilvans èn stads ospitants gentils e purschè als numerus giasts in program cun musica da vaglia e plets empernaivels. Philipp Tuor, il president da la Societad da musica Trun, è sa mussà ventiraivel da pudair beneventar ina uschè grondra raspada en la sala polivalenta. Drizzà intgins plets cordials a veteranas e veterans ha lura er Donat Nay, il president communal da Trun. Josef Schaniel, il Surmiran sesent a Cuira e dapi in onn president da l'uniun che reunescha veteranas e veterans da musica da noss chantun, ha manà speditivamain la dieta. Tar quella èn ils tractandums statutars plitost secundars, persuerter è la cumpagnia il pli principal. L'uniun haja da preschent 1400 commembers e commembras, ha ditg Josef Schaniel e da nov appartegnia la Musica instrumentala Salouf Mon Stierva a l'uniun. Plaschair ha il president er gi da las set delegaziuns da veterans dals chantuns amis. Lur preschientscha numerusa conferma la rela-

ziun empernaivla tranter veteranas e veterans da musica er ordaifer il Grischun.

### Fadia da chattar localitads

Tenor turnus organischa mintg'onn in'otra musica dad in dals quatter districts da musica la dieta. La proxima dieta duai avair lieu en il district da musica III e perquai è Josef Schaniel i a la tschertga dad ina societad da musica che fiss pronta d'organisar la dieta 2015. Intginas musicas instrumentals han gnanc dà resposta ed autras han simplamain naginas localitads per ina dieta cun passa 400 persunas. Suenter numerusas respostas negativas ha lura Josef Schaniel chattà cun la Musica instrumentala Savognin in organisatur da la dieta 2015. Tumasch Wasescha, durant blets onns cassier da quella societad da musica, ha ditg che musicantas e musicants sa legrian da beneventar en in onn veteranas e veterans da musica en Surses. Gia il 2011 aveva la Musica instrumentala Savognin organisà la dieta da l'Uniun dals veterans da musica dal Grischun.

### Fin ussa duas musicas da veterans

In giavisch da l'Uniun chantunala da musica dal Grischun cun ses president Robert Casanova, dentant er da la federaziun svizra sco er da l'uniun che ha gi sia dieta a Trun fiss da fundar ina musica da veterans en il Grischun. Ueli Nussbaumer, il commember da l'uniun tetgala naziunala da musicantas e musicants, ha ditg che 16 uniuns chantunals da 26 hajan gia ina musica da veterans. Singulas

hajan schizunt passa 75 musicantas e musicants. Bel fiss sche er il chantun Grischun avess bainprest ina musica da veterans, ha manegia Ueli Nussbaumer. Fin ussa han il Grischun central ed il Partenz ina musica da veterans activa. Cun ina retschertga vul l'uniun dals veterans da musica examinar sche l'interess per fundar ina musica da veterans è avant maun.

### 18 veterans e veteranas

En in mument da silenzia han lura ils preschents dà per adina adia a lur 23 amis da musica ch'èn morts dapi la dieta dal 2013 a Müstair. In mument pli legraivel è lura stà quel nua che l'uniun ha undrà veteranas e veterans. Tranter quels 18 sa chattan er intgins da societads da musica da l'intschess rumantsch. Undrads per 60 onns musicants activs èn vegnids Anton Schmid e Placi Wenzin da la Societad da musica Surrein/Rabius. Ils dus veterans han betg mo vivi ils davos sis decennis per la musica, na els èn er stads commembers activs en la suprastanza da la furmazion da musica e fatg part da numerus comités d'organaziuns da festas da lur societad da musica. Da nov commember d'onur da l'Uniun dals veterans da musica dal Grischun è dapi dumengia Eugen Bearth da la Societad da musica Sumvitg. El è uschia gia dapi 50 onns in musicant fidà. Sis musicants èn vegnids undrads sco veterans federals (35 onns) e nov musicants èn da nov veterans chantunals (25 onns).



Da Savognin a Trun èn vegnids quels traits veterans: Ricardo Savoldelli, Cyril Brenn e Claude Pittet (da san.).